

MALINCONII

La mattina, quand foo
i me devozion in sulla tazza
e poeu el bidé, pensi:
come lee
che la passa e la va,
tucc i dì
un quai coss de mì
el me saluda
e el me lassa scià.

Quand sérom fioeu
e andavom a pee biott
robaa i scires,
i mognàgh e cattàvom i grattacù
'dree i sces,
sérom tucc felis e content
de quel pocch de nient
che gh'avevom.
Adess gh'emm tutt,
gh'emm i comodità
ma, vardee on poo 'l destin,
manca 'l pussee, manca l'età.
Fà nagott. Coss'hinn sti malinconii?
Tira su i calzon e a sti pensee
dagh minga a trà.